

李文忠公奏稿

李文忠公奏稿

卷之三十目錄

奏調吳大澂片

光緒三年九月初三日

籌濟豫賑摺

光緒三年九月十九日

駐洋幼童勻撥經費摺

光緒三年九月十九日

蘆鹽緩徵正課摺

光緒三年九月十九日

籌議京城省運糧摺

光緒三年九月二十一日

直屬籌辦糶撫摺

光緒三年九月二十一日

惠陵經費請減改片

光緒三年九月二十一日

海防支應請銷摺

光緒三年十月初四日

請給德羅他寶星片

光緒三年十月初五日

直東撫綏緝捕情形摺

光緒三年十月二十二日

分途運糧入晉片

光緒三年十一月初二日

近省河隄工程摺

光緒三年十一月初二日
附清單

請東省寬濟晉賑摺

光緒三年十一月十四日

潮州勸捐晉賑片

光緒三年十一月十四日

整頓招商局事宜摺

光緒三年十一月二十五日

海運官物統歸商局片

光緒三年十一月二十五日

京城外變通平糶摺

光緒三年十一月二十八日

會查安陽縣參案摺

光緒三年十二月初三日

禁止燒鍋片

光緒三年十二月十八日

近省隄河籌勸息款片

光緒三年十二月十八日

張家口工程摺

光緒三年十二月十八日

南北籌運濟賑摺

光緒三年十二月二十三日

音振獎章摺

光緒三十年十二月二十三日

李文忠公奏稿卷三十

全集一之三十

桐城吳汝綸編錄

奏調吳大澂片

光緒三年九月初三日

再天津現辦晉豫兩省徵收賑糧轉運事宜並月購糧石源源運濟又爲晉省勸辦捐賑事關重要頭緒繁多必須集思廣益得人助理查有翰林院編修吳大澂才識闕道心存利濟條理亦復精詳歷年助辦直省賑務躬親瑣屑不憚煩勞今因晉省災重在京竭誠勸捐聞已集有鉅款其實心好善胞懇愛民在儒臣中尤不易得擬請

敕下翰林院卽令該編修刻日來津會同丁壽昌黎兆棠等籌辦一切必於災區裨益非淺理合附片具陳伏乞

聖鑒訓示謹

奏

卷三

籌濟豫賑摺

光緒三年九月十九日

奏為豫省奉撥江北漕糧派員督催全數運往並撥給銀兩以濟賑需恭摺仰祈

聖鑒事竊臣欽奉光緒三年九月初四日

寄諭李鴻章奏奉撥督豫兩省賑糧請變通辦理所籌甚合機宜所有山西原截之江安漕糧四萬石該督卽飭丁壽昌等妥為經理由水路運至河南道口交卸並著李慶翱迅派大員馳赴道口設局接收轉運等因欽此旋據江安糧道催令糧船陸續由通抵津正值商民爭運糧鹽貨物既難猝雇多船且從新裝卸徒稽時日江北船戶因張秋至東昌一帶運河枯涸難行若在北守陳謀生無計願以原船運送道口藉得水腳補苴遂飭丁壽昌等與江安總運委員龔自機妥細商定仍派江安原來委員押運酌給薪

水並議明船戶水腳刺淺等項即於九月十五日全數由津開行
責令該委員等並沿途文武晝夜催趲前進又派營務處記名道
吳毓蘭督催速赴道口監兌惟聞道口以下至直境龍王廟一帶
河水淺不盈尺糧艘重載難行已飭吳毓蘭沿途察看情形如實
難前進即馳赴道口與該省按運委員商酌由豫趕緊多派民車
接卸臣並咨函馳商李慶勳豫飭委員相機合力籌辦總期無誤
賑需又天津海防經費項下原撥豫省銀六萬兩續由部庫劃歸
天津撥給銀六萬兩均奉

旨由直代購賑糧已飭據丁壽昌等先撥銀四萬兩交道員朱其
昂等赴南省采買小麥旋據李慶勳來兩豫省截留京餉漕折銀
十餘萬兩已委員四出買糧惟災區較廣賑款不敷統計各項所
需均未能即時應用雖已請展黔捐借用亦難救急專派直隸州

嚴作霖來津請領原撥銀六萬兩有此指項應辦賑務均可提前
辦理等語臣面詢來員嚴作霖豫省雜糧時價尙平由此開購運
至豫不甚合算蓋天津本無存糧須分赴奉省南省采買刻下奉
糧陳者已盡新者入市尙少官商爭購價值頓昂南省小麥亦形
短缺而由各路運津山津運豫長途跋涉糜費滋多且河道淺涸
轉運艱難瞬息封河殊覺緩不濟事查豫省應需賑糧先經委員
四出購辦又運去江安漕米四萬石續奉

諭旨撥給山東漕米八萬石其鄰省濟甯潁州一帶收成尙好有
糧可辦有河可通水陸挽運較爲便速不似由津購運之艱遠李
慶朝旣將賑務提前辦理一切需費不費專指天津銀兩開辦必
須酌撥接濟以免災黎懸盼當飭支應局將海防項下原撥銀六
萬兩於十七日撥交來員嚴作霖趕緊領回俾應急需其劃撥銀

六萬兩除轉運江安漕米水腳等項下餘應否購糧以備春賑仍
緘商李慶翱核撥酌辦所有豫省奉撥江北漕糧派員督催全數
運往並撥給銀兩以濟賑需緣由理合恭摺覆陳伏乞

皇太后

皇上聖鑒謹

奏

駐洋幼童勻撥經費摺

光緒三年九月十九日

奏爲駐洋肄業幼童經費不敷請於南北洋海防項下分年勻撥以期造就人才恭摺仰祈

聖鑒事竊臣鴻章前與原任大學士兩江督臣曾國藩奏請挑選幼童赴美國肄業以求洋人擅長之技而爲中國自強之圖當經總理衙門核覆奏准自同治十一年起至光緒元年止每年挑選幼童三十名共合一百二十名分作四批按年出洋肄業在案原議每批幼童駐洋十五年每名每年束脩膏火屋租衣食等項銀四百兩連委員繙譯教習薪水及其餘一切費用通計首尾二十年需銀一百二十萬兩在江海關六成洋稅項下按年匯寄應用有餘歸公不足補給上年原帶幼童出洋之太常寺卿陳蘭彬回華而稱幼童駐洋十五年通計每名每年銀四百兩殊不敷用接

帶委員主事區謬良原派委員補用道容閱自洋續稟亦以爲言
臣鴻章飭令該委員等通盤籌算核實具報旋據區謬良容閱籌
算稟覆懇請添撥經臣葆楨咨請總理衙門核示接准覆稱此項
經費應於何關添撥由臣等斟酌奏明辦理等因查區謬良等節
次來稟美國稅增物貴束脩膏火屋租衣食各費倍於從前幼童
初到美時或入小書院或附人學館用費尙省迨三四年後漸次
考入中大書院及技藝院軍政院船政院每院又各有班次等第
逐年循序而進學有淺深館有大小館與年而俱異費亦與年而
俱增計每批每名至第五年約須加銀二百兩第七年以後約須
加銀四百兩等語察核所稟係因南北花旗戰爭後元氣未復稅
項頻加諸物昂貴一切用費增多本屬實情原議經費係就以前
華人在彼情形約略科算亦未能細考書院大小班次等第蓋遠

隔重洋事屬創始實難逾度懸定也此舉爲造就人才漸圖自強
至計關繫甚大據報頭二批學生一二年間已有可進大書院之
童卽應專心研求以裨實用斷無惜費中止之理惟庫款支絀籌
畫艱難不得不格外節省臣等再三諮詢酌中核減每批第一年
至第六年尙在中小書院應仍照原奏每名每年銀四百兩由該
員等截長補短通融濟用第七八年每名每年應添給銀二百
兩第九十兩年每名每年應添給銀三百兩第十一年至第十五
年照奏定章程學成游歷用費較廣每名每年應添給銀四百兩
現有事故撤回幼童九名騰出原撥經費及減去繙譯每年薪水
銀六百兩均應撥抵統計除原撥經費一百二十萬兩外先後九
年約共應添撥銀二十八萬九千八百兩係分批按年乘除推算
其開數目參差不一有每年應添撥一千二百兩者有每年應添

撥四萬二百兩者應令江海關道揆定年分批數照章覈明匯寄
仍飭該委員等撙節開支分晰造報如續有事故撤回幼童卽報
明將原撥添撥經費隨時截止查江海關六成洋稅解支不敷原
撥出洋經費已巨勢難再令籌添此外各關均甚竭蹶無可指撥
因思幼童出洋肄習各項技藝原爲洋務海防儲備人材他日學
成回華可資器使此項添撥銀二十八萬九千餘兩自應於江海
關四成洋稅內之二成奉提南北洋海防經費內就近按年勻撥
分批搭匯在該關爲有蓄之款而海防亦分攤無多庶出洋幼童
學業可成不至以經費不敷淺嘗輒止臣等往復咨商意見相同
除分咨總理各國事務衙門戶部暨福建督撫臣知照外謹合詞
繕摺具陳伏乞

皇太后

奏
皇上聖鑒訓示謹

蘆鹽緩徵正課摺

光緒三年九月十九日

奏爲本年天旱河涸蘆鹽運艱銷滯請將正課分成緩徵藉紓商困恭摺仰祈

聖鑒事竊據長蘆通綱商人萬盛新等瀝陳天旱河涸運艱銷滯力難完課情形呈請調劑當經行司籌酌妥議去後茲據長蘆運司如山詳稱各商經營離業銷路之暢滯全以年成豐歉運道通塞爲憑長蘆如正定大名順德廣平深州冀州定州趙州八府州屬及豫省行銷蘆鹽各州縣由津運鹽前往河路多發源於晉豫兩省本年直晉豫皆旱各河水源枯竭鹽船挽運甚艱卽改道陸運而程途繞折車腳浩繁較河運增費數倍遂致各商存坨之鹽多未告運已運之鹽多未抵岸卽附近之順天保定河間天津易州各屬亦因河道淺涸節起剝糜費滋多告運皆不如數計自

春關二月起至秋關八月底止出庫之引其僅二十七萬四千七百十九道過關之鹽其僅十九萬七百四十一包較歷屆告運不及十分之五加以引岸到處亢旱硝鹽遍地貧民私煎私販人皆貧賤食私官引幾至停秤眾商竭蹶不堪體察網情必須量予調劑該商萬盛新等懇將本年應完正課全數緩徵該司查從前水旱爲災疊有緩課之案載在鹽志今年商困情形以正定大名順德廣平深冀定趙八府州屬及豫省行銷蘆鹽各州縣爲最重順天保定河間天津易州五府州屬爲次重惟正課關繫京奉各餉若如該商等所請全數緩徵則解款無從籌措該司悉心籌議除直豫懸岸並官辦各岸不計外擬請將情形最重之正定等八府州屬及豫省行銷蘆鹽各州縣認辦額引各商本年十月奏銷應完光緒元年正課銀二十萬三千四十五兩五分於奏銷時先徵六

成其餘四成緩至明歲菜秋後分作五年帶徵其情形次重之順
天等五府州屬認辦額引各商本年十月奏銷應完光緒元年正
課銀十三萬四百二十兩八錢五分六釐於奏銷時先徵八成其
餘二成緩至明歲菜秋後分作三年帶徵至京奉各餉不敷撥解
由司月行設法籌墊俟緩徵課銀分年徵起再行歸款如此分別
籌辦商困藉可稍蘇要餉庶免貽誤等情具詳請

奏前來臣查農民以力田供賦商以行鹽供課田失收成則必
緩賦以恤民鹽難運銷亦須緩課以恤商是以從前水旱為災疊

奉

恩旨緩課有案長蘆各商歷因攤認參課帑利交款加重成本倍
增頻歲災傷疲累已極幾有積重難返之勢今則直省旱歉晉豫
兩省並皆大旱各河乾涸運道不通鹽乏到岸之期空賠守候之

費引地戶口食鹽愈稀私販又復充斥雖營飭運司設法緝私辦
運乃水無來源稍鹽徧地人力難施秋運將竣過關之鹽尙不及
二十萬包實爲歷年所未有該司擬將本屆應完正課分成緩徵
係爲保全大局起見相應仰懇

天恩俯准照辦藉紓商困其應解京奉各餉仍由臣督飭該司竭
力設法籌墊解足以濟要需理合恭摺具

奏伏乞

皇太后

皇上聖鑒訓示謹

奏

籌議京城晉省運糶摺

光緒三年九月二十一日

奏為遵

旨酌籌京城晉省運糶事宜分別辦理恭摺仰祈

聖鑒事竊臣欽奉光緒三年九月十七日

寄諭翰林院編修何金壽奏請早籌鉅款購糧平糶一摺本年山西各省被災甚重直隸屬境亦大半災荒飢民來京者不少粒食維艱大為可慮何金壽所陳儲糧平糶之法自為未雨綢繆惟需款甚多斷非一時所能猝集該編修請飭籌借銀一百萬兩分路購糧並各處設立糶運平糶等局是否能行著李鴻章酌度情形妥速籌畫奏明辦理等因欽此遵查本年直隸山西河南等省亢旱日久其受災情形則以山西為最糧缺價昂亦惟山西為甚而直隸近依

畿輔京城根本所關荒年民食艱難必須設法籌備何金壽思患豫防請籌款購糧平糶實爲救荒至計自來水旱災傷無不以平糶爲先務是以臣於八月初間卽奏明籌款委員前赴奉天采買惟該編修請由臣借撥庫款二三十萬再借洋款數十萬其湊銀一百萬兩誠如

聖諭斷非一時所能猝集前經飭據津省司道湊撥銀十一萬兩今又另摺請提練餉錢約合銀十萬兩其二十一萬兩均爲直屬購糧之需其已購運晉糧及現議購運京糧之款不在其內籌措實屬不易若洋款商借甚難利息尤重自應無庸置議其擬由臣派員分赴上海奉天東昌熱河收買米糧於天津設立糶運總局於晉之太原平陽豫之開封懷慶各設平糶局派員經理並派員發運京城設局平糶殊覺局面過寬財力人力皆有未逮而事理

亦有未盡協者東昌一帶同是旱歉無糧可買熱河陸運較遠此時灤河已難行船該處現正采辦駐防等兵糧亦未可大批購運致妨沿邊民食應仍辦運奉省雜糧南省大米爲便直屬糶賑尤以奉糧爲宜至晉豫兩省應否一併由直運糧平糶則必體察情形核計糧價運費乃有把握臣前詢河南來津委員知該省雜糧時價小米市斗每石一百九十斤買價制錢六千三四百文約合銀四兩二錢零按官斗每石一百四十餘斤約合銀三兩二錢零高粱市斗每石一百八十斤買價制錢四千四百文約合銀三兩按官斗每石一百三十餘斤約合銀二兩二錢零奉省小米以市斗合成官斗每石買價約銀二兩四錢高粱合官斗每石約銀一兩四錢是豫省時價每官石小米高粱均僅貴奉省價銀八錢零若由直購買分處設局運糶須加奉省海運至津河運至衛輝

陸運至懷慶長途舟車之費采買運糶各處員役薪工之費水陸起卸及沿途護送之費統計每石約及銀一兩是已增於該省時價勢難再行減價平糶聞該省道以下河水淺不盈尺棉艘難行則陸運又不止二百餘里糜費更添殊不合算若由海運至山東利津口人大清河以遠開封亦覺非便大清河即黃河海船並不能入民船逆流上駛又無緯路挽運極艱淤灘甚多動虞擱淺臣前在東境勦捻曾由大清河運解軍火深知其難查豫省歸德陳州一帶歲收中稔鄰近之濟甯曹州潁州壽州等處亦俱有秋濟曹有黃河可通潁壽有淮河沙河可通就此數處購糧水陸運路較爲便速省一分費用即可輕一分糶本庶貧民得霑實惠臣前於轉運江北漕米摺內已大略陳明且撥給豫省賑款銀十二萬兩本係奉

旨由直代購賑糧奉慶朝前已派員來津領去銀六萬兩頃又咨請將下餘銀兩一併給領可知該省有糧可購無庸直隸代爲經理矣山西災區既廣毘連各省又皆歉收現准曾國荃函稱小米市斗每石二百九十斤價銀十四兩六錢按官斗每石合銀七兩三錢高粱市斗每石二百四十斤價銀七兩三錢按官斗每石合銀四兩一錢岑是每官石小米較豫省貴至四兩零高粱貴至一兩九錢而較奉省買價則小米貴至四兩九錢高粱貴至二兩七錢零雖由津購辦運路險遠需費甚鉅但該省舍此無可他求自應協力籌助業經飭據招商局道員朱其昂等節次籌款采辦米糧一萬八千石陸續船運一由清河至保定府一由運河至交河縣泊頭鎮均易車陸行至獲鹿縣由晉省派員在獲鹿設局接運至太原等處平糶現已辦有成效其該省平陽絳解蒲州等處距

省西五六百里至千餘里中隔韓侯嶺甚形險阻該數屬產糧木
少向藉他處接濟今四面旱荒民食更缺糧價益昂待糴尤急奏
調來津之翰林院編修吳大澂已勸捐集資購糧七千石卽由衛
河出豫之道口登陸至清化鎮入山西澤州轉達平陽一帶察看
設局平糶仍招勸南中紳商續籌運濟吳大澂實心利濟不憚煩
勞曾任陝西學政平陽一帶情形較熟必能有裨災區此直省已
爲山西兩路籌辦運糶之大略情形也京城爲

輦穀重地首應足食現值畿南災歉糶少來路兵民糶食維艱自
應力籌兼顧臣商飭輪船招商局道員朱其昂唐廷樞籌借資本
赴南省趕緊購買大米於封河前運津卽由該員等於通州設轉
運局於京城相地設平糶局妥爲試辦查照市價酌量減值平糶
俾奸商回戶不得居奇官弁兵民自行赴局糶買來春開河仍源

源接運以固根本現計封河期近深恐趕辦無多但冀有米至京
平糶使市價不過騰貴俟明年秋成後察看情形再議截止此係
市面公平交易之事應責令該員等督飭司事妥實經理似無須
請派京員以免紛擾除將直屬糶撫事宜另摺陳奏外所有酌籌
京城外省平糶分別辦理緣由理合恭摺由驛覆陳伏乞

皇太后

皇上聖鑒訓示謹

奏

直隸籌辦賑撫摺

光緒三年九月二十一日

奏爲直隸地方被災現飭確查秋成分數並先後籌辦賑撫大概情形恭摺仰祈

聖鑒事竊臣欽奉光緒三年九月初七日

寄諭御史劉恩沛奏畿輔被災宜借款平糶分地勸貸井工代賑應如何辦理之處著李鴻章籌議具奏等因欽此又奉九月十七日

寄諭翰林院編修何金壽月片奏直隸各屬荒歉者多州縣捏報秋成分數著李鴻章卽速派委員再行詳細查勘如有被災過重者卽設法拯救以蘇民困等因欽此仰見

朝廷廡念民依集思廣益之至意欽悚莫名伏查本年直境四月以後天氣亢旱並有蝗蝻萌生處所至六月下旬始皆得雨但未

能普律深透七八月閒續得數次而多寡不一或此有彼無如京東之永平遵化京北之宣化營窟渥澤秋收約有七八分順天易州所屬稍次尙不失中稔天津趙州定州大名順德廣平各屬均有歉收保定河間正定深州冀州各屬則被旱較甚然其閒情形又各不同如南運河以東天津青靜滄南一帶八月十五日得雨後又有九月初三初十等日之雨麥已普種河西交河一帶則未盡翻犁深州屬境災歉而該州本境收成尙好且有一縣之中此鄉不如彼鄉一村之中此區不如他區者蓋自京東西順屬而外雨皆未勻也其災歉較重者省之東南爲景州阜城交河獻縣等處省之西南爲唐縣行唐新樂等處中路深冀所屬爲武強棗強等處據藩司詳報各屬災歉村莊照案剔除片計通省彙算約收六分雖實收難得此數而除去災歉村莊亦無甚懸遠詢之河間

等處紳董所言略同何金壽謂保定河間正定深州冀州所屬數十州縣秋收差可支持者不過數處其餘收成大率不過一分殊有未確臣恐州縣諱飾疊次通飭據實勘報分別蠲緩糧賦寬其徭役並按處委員會勘欽奉前因又經嚴切責令各府州親往再行詳確勘查分別輕重妥擬稟報儻涉捏混卽行嚴參統俟勘定實在分數詳細核議奏辦臣前因秋收歉薄麥田又難普種糧價日昂貧民糊口維艱飭據津省司道湊借庫款銀十一萬兩派員前赴奉天采買雜糧以資分撥糶撫並招徠遠近商販一體購運一面飭令各屬勤恤民隱加意撫綏就地酌籌補救並以河間一帶積歲凶歉盜賊滋多復飭該府體察情形妥籌捐濟茲劉恩溥奏請於津省庫款中借動二三十萬多購奉糧分撥災區源源平糶並分地勸貸井工代賑等事與臣業經籌辦各節及何金壽所

奏籌款購糧平糶大致略同查直隸係缺額之區著名瘠苦向來
庫款人不敷出近年頻遭水旱羅掘一空前由津省湊撥購糧銀
十一萬兩已甚竭蹶現與司道籌議冬春爲日過長不得不多籌
購運查有練餉制錢分借江浙典商尙有尾款可提一面飭提制
錢十五萬串約合銀十萬兩一面先由海防經費內挪借令其折
銀歸款以作本省購糧之需解交原派采買委員仍在奉省購辦
目下奉天營口陳糧已盡新糧入市尙少各處官商紛紛爭購原
辦之糧尙未購足已催令趕緊收買務於封河前一律運津現撥
之十萬兩卽接續采買冬閒糧多價亦較賤明春開河運津可資
接濟頃已分撥災款較重之景州阜城交河獻縣河間東光武強
等處其高粱二萬五千石先飭派人來津俟奉糧運到隨卽運回
並派委員會同各州縣體察情形分別糶撫大名所屬已另行酌

借釐款並由地方官籌墊銀兩采購春麥以備平糶及出借籽種
之需正定之行唐新樂藁城等縣亦請借款自行購運平糶此外
荒歉各屬並飭司道府州分別情形輕重糧價貴賤何處應撥糧
平糶何處應撥銀撫恤速籌詳報核辦約計封河以前商販來津
之糧必尙不少可助官辦之不足惟辦糧之款驟難歸補各屬分
別賑撫所需頗巨亦應預籌濟用本年下忙錢糧除蠲緩之外徵
收恐難踴躍臣已商飭藩司竭力設法月湊銀十萬兩若司庫不
能如數卽酌量挪提保定練餉局兵餉以應急需其分地勸貸井
工代賑兩條皆屬有裨荒政復通飭各道府督率州縣各就情形
邀集紳董悉心妥酌富濟貧不拘成數務期窮黎得霑實惠開
井一節雖不足以代賑可備旱田汲引之用臣久經通飭勸辦添
井不少惟山地城地不宜茲更竭誠諭勸飭將新開井若干稟請

驗收酌獎其有紳富慷慨捐賑應查照歷辦章程核給獎敘並准
移獎有借款不取息者計其息項一體給獎有出借錢穀較多者
專案奏獎以示鼓勵現據河間紳士韓玉堂首先捐銀三千兩洵
屬急公好義俟交齊彙案核辦以上捐貸事宜均令督同公正紳
董經理不假吏役之手不得藉端擾累仍隨時認真彈壓不准窮
民藉詞聚眾均糧並分撥練軍在東西各大道擇要巡駐會同地
方文武嚴密防緝盜匪毋任嘯聚勾結滋事以靖地方所有現飭
確查秋成分數並先後籌辦賑撫大概情形理合恭摺覆陳伏乞

皇太后

皇上聖鑒訓示謹

奏

惠陵經費請減改片

光緒三年九月二十一日

再據津海關道黎兆棠詳稱光緒三年該關六成洋稅項下奉撥
惠陵工程銀五萬兩又提欠解元年洋稅項下京餉銀四萬兩共
合九萬兩已於六月開挪款解過銀三萬兩查該關六成洋稅除
坐支稅務司薪水本關經費外向充本口海防練軍額餉歷因收
數無多入不敷出今年又值亢旱河道皆涸商貨艱於轉運地方
災歉諸物帶銷且新關進口之貨米麥居其大半照案驗免洋稅
倍形短絀現距封河不過一月應支各款甚巨竭屢萬分所有未
解前項工款銀六萬兩擬再竭力湊解銀二萬兩尙不敷四萬兩
委實無從籌措請月行改撥等情前來臣查該道所詳均係實在
情形既據一再湊解銀五萬兩已屬不遺餘力無可增添惟
惠陵工程喫緊需款甚殷勢難緩欠而直省積歉之餘庫空如洗

又無別款可挪萬不得已擬飭保定練餉局於練軍月餉項下陸續勻提銀四萬兩以抵該關應解之數卽交該道彙解仍由局就款開除練餉計口授食木形支絀因工款關緊要非他項可比不敢不暫時通融撥濟應請戶部於奏撥來年工程時酌量核減改撥他省免致短缺貽誤實爲至幸理合附片具陳伏乞

聖鑒敕部查照謹
奏

海防支應請銷摺

光緒三年十月初四日

奏爲查明天津海防支應局光緒二年分收支餉需按款造冊請銷恭摺仰祈

聖鑒事竊據天津支應局司道會詳津郡海防改設練軍並原設通永鎮標大沽協標官兵雲字馬隊應需餉乾等項向在津海關六成洋稅洋藥釐捐東海關協餉長蘆鹽斤復價甯河釐捐各項下隨時籌撥按照定章撥節支放所有光緒元年分收支款目業經奏咨准銷在案查上年六月閒防務緊要飭派葛沽營守備張曙德常駐新城添練葛沽營弁兵查照北塘營兵駐守礮臺加給口分之例守備一員月給銀九兩把總二員經制一員額外四員每員各月給銀六兩兵丁三百二十五名每名月給銀二兩均於七月初一日起支又天津軍械所爲各處防軍鎗礮藥彈總匯收

支極繁軍械分儲海口及城內外原有勇夫不敷守護添募什長三名每名月給銀三兩護勇三十名每名月給銀二兩均於六月初一日起支又調赴奉天雲字營馬隊四百名於上年閏五月十九日撤回援奉津軍步隊一千名於上年十月初八日先行撤回四百八員名應支加餉添夫等項均於到津之日住支其奉省留防津軍五百九十二員名仍照練軍出師章程分別正餉加餉按三箇月一次源源解濟又海勇口糧照章核給大沽北塘新城三河口水師營等處礮臺續設礮位照案支給經費其餘支發一切款項悉照奏定章程及准銷成案核給造具細數清冊詳請奏咨前來臣逐加覆核計自光緒二年正月初一日起截至十二月三十日共收款銀三十九萬五千七百九錢二分一釐七毫三絲其支款應歸戶部核銷銀三十二萬七千四兩九錢九分六釐六

毫三絲一忽四微兵部核銷銀六千二百七十三兩二錢工部核
銷銀六萬五千二百九十七兩六錢一分七釐七絲七忽二微共
應銷銀三十九萬八千五百七十五兩八錢一分三釐七毫八忽
六微除本案內扣收過平餘銀六百五十二兩九錢七分六釐一
毫七絲七微儘數動支外計不敷墊支銀二千二百二十一兩九
錢一分五釐八毫七忽九微係隨時籌墊並承辦各員請領未發
之款俟准部覆再行分別辦理除清冊咨部查照外所有天津海
防收支餉銀造冊請銷緣由理合恭摺具陳伏乞

皇太后

皇上聖鑒敕部核銷謹

奏

請給德羅他寶星片

光緒三年十月初五日

再據李鳳苞函稱在德國斯邦道軍營見該國兵官德羅他教導華弁劉芳圃等四人技藝勤加指授調護接待視如子弟頗獲進益請

奏賞該兵官寶星以示激勸等語查郭高燕春開派員往德國查勘卽稱德羅他教練盡心欲得

恩賞寶星以爲榮寵德羅他係駐京公使巴蘭德之姪婿臣於五月間會晤巴蘭德曾面加獎譽自應由臣飭局仿造二等金寶星一而飭交駐津德國領事傳

旨賞給以示懷柔而期後效除咨請總理衙門照會巴蘭德轉行知照外附片陳明伏乞

聖鑒訓示謹

奏

直東撫綏緝捕情形摺

光緒三十三年十月二十二日

奏爲直東接壤地面撫綏緝捕情形恭摺仰祈

聖鑒事竊臣等欽奉光緒三十三年九月十九日

寄諭給事中崔穆之奏直隸山東接壤地方秋收歉薄民情不靖
南北驛路時有劫奪之案嗣屆隆冬吏恐貧民無賴之徒嘯聚爲
患亟宜安輯巡防等語著李鴻章文格妥議章程撫恤災黎防緝
奸宄卽行認真籌辦以蘇民困而靖地方等因欽此仰見

朝廷軫恤窮黎安良弭盜至意欽佩莫名遵查直省東南面天津
河開冀州廣平大名所屬東省西北面武定濟南臨清東昌曹州
所屬均有兩省交界之地平時卽不免梟盜出沒每屆冬令向須
酌添兵隊協防今值早歉之時緝捕更宜嚴密撫綏尤不可緩亦
不獨接壤地面爲然前經臣鴻章酌籌應辦事宜疊飭被旱各屬

查勘災歉分數議請蠲緩糧租先行減免徭役其情形較重者撥給銀糧分別糶撫並令就地籌勸捐貸分濟鄉鄰以助官力之不逮一面提早辦理冬防派令保定天津正定大名各鎮馬步練軍及駐紮保定之淮軍馬隊駐紮河天之雲字樂字直字各營馬步隊分路擇要巡駐會同地方文武防緝其順天永遵宣化等屬雖俱有秋並令古北口通永宣化練軍酌撥巡防已於九月二十一日奏報籌辦糶撫事宜摺內大略陳明在案至東省被旱較輕臣文格亦已酌飭各屬妥爲撫綏並調撫標練軍馬隊勤字嚴字智字振字忠字各營馬步隊利捷營水師沂州協兗沂道等勇隊擇要分布會同地方文武防緝並經臣等往復咨商分飭兩省接壤地面防軍隨地就近會哨彈壓所在州縣營汛一體聯絡巡防遇有梟盜糾劫之案不分畛域合力兜捕無使彼等此鼠嘯聚句結

其通衢大道及附近晉豫邊界亦經擇要布置現在尙稱綏謐雖兩省轄境遼闊未能逐處設防總當隨時嚴督文武認真整頓妥實經營不任稍涉玩愒冀遏亂萌以靖地方謹合詞恭摺陳伏乞

皇太后

皇上聖鑒謹

奏

分途運糧人胥片

光緒三十一年十一月初二日

再提辦江廣新漕五萬石撥濟管賑前奉九月初四日

諭旨著飭朱其昂等一面領銀一面設法墊款購米務於封河前
運津並令丁壽昌等轉運等因欽此當經分飭遵照卽據招商局
道員朱其昂等籌墊銀兩派員分赴江北蘇常鎮江上海等處趕
緊采購由滬裝載輪船跟接運津經丁壽昌黎兆棠派員隨到隨
收計自九月二十八日開斛起至十月二十四日止漕米五萬石
全數運收完竣購辦甚爲迅速此項漕米歷屆由津運通剝價按
交倉不斛每石給京平銀八分一釐四絲又新增剝價按交倉洪
斛每石給京平銀五分前因撥作管賑已奏明將運通剝費卽貼
補轉運賑糧之需現據朱其昂等按石如數移交丁壽昌等濟用
至轉運則係分途一由運河舟運至交河縣泊頭鎮易車至獲鹿

縣以達晉省北路一由運河舟運至山東館陶一帶易車至直屬
邯鄲縣蘇曹鎮經豫境入晉之黎城縣東陽關一由衛河舟運至
河南滑縣道口鎮一帶車運至清化鎮入晉之澤州皆達該省南
路據丁壽昌等預爲籌定於漕米陸續到津卽陸續斛收轉運截
至十月底止已一律前進按起派員押催分處設局雇車接運其
直晉交接之處獲鹿則派道員朱其詔經理東陽關清化鎮則由
編修吳大澂督籌兼顧曾國荃並派員分赴獲鹿東陽關清化鎮
設局接收以便分運災區接濟窮黎口食至奉撥豫省江安漕糧
四萬石前已原船起運奏報旋據派往監兌督催道員吳毓蘭來
稟臨清以上水勢遞淺沿途節節雇船起剝於十月十八日抵大
名龍王廟李慶朝已派員至道口一帶接收此時計已到岸交兌
卽可分撥災區無誤冬賑除分咨查照外理合附片具陳伏乞

聖鑑
奏

近省河隄工程摺

光緒三十一年十一月初二日

奏為光緒三十年附近省城隄河歲搶修工段丈尺動支銀數開單
奏報仰祈

聖鑒事竊照附近省城河道隄工如深澤無極邢州安平博野蠡
縣高陽等境滋河瀦龍河隄任邱縣千里隄安州南北隄雄縣南
老隄西槐支河隄趙村壩保定縣清河埵或工段縣長或地居險
要皆關民生利害又新開趙王河工長六十餘里節宣西淀漲水
蘆僧河工長一百三十里分減大清河水勢均須認真修防前經
奏定每年在於清河道庫河淤地租項下撥銀三千兩以為各工
采購料物搶修之用免其造冊報銷經工部覆准仍令工竣時開
單奏報在案本年春間即飭照數撥給銀兩購備椿料責成清河
道葉伯英前往駐工認真督辦伏秋兩汛一律平穩茲據該道會

同濟臬兩司將工段丈尺動用銀數遵照定章詳報前來臣覆核
無異理合開具簡明清單恭摺具

奏伏乞

皇太后

皇上聖鑒敕部知照謹

奏

謹將光緒三年附近省城隄河各工歲搶修工段丈尺動用
銀數開具簡明清單恭呈

御覽

計開

一任邱縣趙王河兩隄險工開段共合工長一千四百五十八丈
搶修椿料共用銀八百七十二兩七錢七分四釐

一雄縣趙王河兩隄險工開段共合工長一千二百九十三丈搶
修椿料共用銀七百七十四兩八錢一分六釐

一保定縣趙王河兩隄險工開段共合工長二百四十九丈搶修
椿料共用銀一百八十八兩三錢一分五釐

一雄縣蘆僧河兩隄險工開段共合工長五百八十二丈搶修椿
料共用銀三百七十九分五釐

一保定縣清河兩埵險工開段共合工長七百六丈搶修椿料共
用銀四百七十八兩七錢一分

一雄縣清河趙村大壩前邊埽蝨陷九段共工長三十六丈搶修
椿料共用銀四百二十九兩三錢五分三釐

以上各工共川銀三千五十一兩六分三釐除給領銀三千
兩支用外計不敷銀五十一兩六分三釐已照數籌補合併

陳明

請東省寬濟晉賑摺

光緒二十一年十一月十四日

奏爲東漕項下奉撥山西賑糧運費不敷尙鉅實難另行設措請
救東省寬籌借濟恭摺仰祈

聖鑒事竊山西今年大旱成災仰蒙

特恩續撥山東漕米八萬石以資賑濟曾國荃因運費無出請借
東省庫款銀六十萬兩爲轉運東漕及江廣漕米之需業經文格
覆奏借給銀十萬兩奉

旨著解交臣發給轉運局濟用等因欽遵在案伏查文格所奏借
撥六十萬兩未能如數籌給本屬實情惟東漕八萬石運至山西
無論南路北路相距皆遠且山道崎嶇艱險計每石運費至少亦
需銀三兩共需銀二十餘萬兩晉省旱非一年物力傷耗財源枯
竭截留京餉早經罄盡奉撥部津各款亦皆支用無餘飢民至四

五百萬之眾待哺嗷竟有朝不保夕之勢曾國荃值此奇荒無從維掘閣敬銘以容官督查賑務更難爲無米之炊直省瘠苦著名地方亦值災歉前已遵

旨設法籌濟賑銀二十四萬兩不敢稍留餘力疊接曾國荃咨函屬臣就近派員籌辦轉運專指東款借到俾應急需今僅十萬兩不特江廣新漕運費不繼卽東漕一項亦尙短十餘萬兩大宗賑米不能入災黎之口殊無以宣

皇仁而慰民望臣夙夜籌維寢饋難安因思東省之力六十萬鉅款固難全籌而甬通融原可不以十萬爲限文格公忠體

國大局關懷素無畛域之見臣與往復緘商該撫臣亦知原借十萬不敷轉運深爲躊躇救災卹鄰之念溢於楮墨竊以民命至重賑務至要臣既奉

命經理運費又經曾國萃屬籌糧運呼籲求助諄不容辭相應仰懇

天恩敕下山東撫臣文格寬籌東漕運費移緩就急迅速設法添借俾奉撥賑糧八萬石可到晉省災區接濟窮黎口食俟籌定後臣即飛商閻敬銘曾國萃遴派大員前往與山東督糧道崧駿會辦轉運事宜約計年內徵兌開春起運該糧道通達政體勇於任事必能妥速其濟至此次續借之款連已借之十萬兩仍由晉省分年籌還以符曾國萃原議所有奉撥濟晉東漕運費不敷請由東省寬籌借濟緣由理合恭摺由驛四百里具陳伏乞

皇太后

皇上聖鑒訓示謹

奏

潮州勸捐晉賑片

光緒三年十一月十四日

再臣奉

命兼籌晉賑捐務災區既廣時日又長非廣勸捐助誠恐杯水車薪不足以資接濟除天津上海漢口甯波各處爲商賈輻輳之區業經咨行地方官設局勸捐已據官紳陸續籌湊尙未集有成數查有廣東潮州府地近海濱紳商向多好義急公因函商福建撫臣丁日昌就近諄囑該處官紳廣爲集腋茲據惠潮嘉道張銑稟稱接札後卽親自馳往汕頭勸辦該處紳商皆踴躍從公義形於色卽經同知銜儘先選用知縣林士騏邀同職員楊炳昭蔡由貴侯亦謙盧衡等極力設法計共捐洋銀二萬圓合一萬四千兩其餘菴埠澄海各屬尙多樂善好施之人查有福建補用知府候補同知郭廷集明幹有爲堪以隨同該道前往勸辦其香港新嘉坡

安南暹羅等處潮人貿易尤多查有候選知府柯振捷候選同知高廷楷深明大義勇於爲善於各該處情形尤爲熟悉可以商派妥實員紳前往勸助以期多多益善仍祈酌發執照實收到潮以示大信而廣招徠等情前來臣伏查潮州水旱連年民情拮据尙復不分畛域籌集鉅款以賑鄰飢實爲好義可嘉惠潮嘉道張銑履任十餘年士民愛戴是以此次勸捐著有成效所有在事勸捐出力員紳應俟續捐數目就緒再行分別從優請獎以示鼓勵並咨山西撫臣曾國荃將部照先行酌發仍咨會廣東督撫臣一體飭遵外合將潮州勸助晉賑大略情形附片陳明伏乞

奏
聖鑒訓示謹

整頓招商局事宜摺

光緒三十年十一月二十五日

奏為遵

旨籌畫整頓輪船招商局事宜並酌議變通辦法恭摺陳仰祈
聖鑒事竊臣等承准機軍大臣字寄九月十八日奉

上諭御史董儒翰奏輪船招商局關係緊要急須整頓一摺據稱
該局每月虧銀五六萬兩因置船過多載貨之資不敷經費用人
太濫耗費日增等語輪船招商原以收中國之利權必須有利無
弊方可以期久遠著李鴻章沈葆楨通盤籌畫於該局經費權衡
出入認真整頓毋得稍有虛糜嚴諭該局不得以辦公為名位置
私人濫行收錄並飭令該局商總和衷辦事勿騖虛名而鮮實濟
等因欽此並將董儒翰原摺鈔給臣等閱看適該局商總道員朱
其昂唐廷樞等在津籌辦直晉賑糶糧石臣鴻章面加考究仍分

飭津海關道黎兆棠署江海關道劉瑞芬密爲查訪妥籌整頓之
策茲據該道等分晰查明擬議章程前來等覆加察核如原奏
置船過多一節查招商局開辦五年已自置輪船十二號追收買
旗昌洋行又添大小輪船十八號旗昌船向走長江爲多若無外
人傾擠江面生意尙旺船隻不至閒擱乃英商太古將裝貨噸銀
大減一意傾跌局船攬載價亦隨減不敷船用以致閒有停擱實
迫於事勢之無如何擬令該局逐加挑剔將旗昌輪船年久朽敝
者或拆料存儲以備配修他船或量爲變價歸還局本籍省停船
看守之費惟勿任中外流氓售去減價相擠其現行各船內有附
局帶管者歲收馬頭費無幾徒分局船攬載之貨除永甯洞庭二
船已據報由局收買歸入商股外其餘三船應全行辭去無庸帶
管又原奏用人太濫一節查該局專講貿易所用必其所習與官

場情形隔絕應由該商總等自行選派以一事權臣等及各關道向無薦人之事每遇載運漕糧時各省咨有轉薦員紳臣屢飭朱其昂等不可礙於情面濫行收錄現在各口岸總分各局共二十七處需人必多在事皆各有職守並無附省官員挂名應差支領薪水之事又原奏該局每月須賠銀五六萬兩等語查該局先後置買船棧等項計價銀四百二十餘萬兩其中資本僅分領各省官帑一百九十萬有奇商股七十三萬零其銀二百六十餘萬兩尙短一百六十萬兩係以浮存挪借抵用計息不貲遂至左支右絀此由局本不足之故加以太古洋行跌價傾軋入不敷出然每年結算官利尙敷衍勻結其暗中虧耗者只有輪船置價一項未曾按年折除並不得謂每月虧賠也又原奏各項費用嚴禁濫支隨時駁飭等語查該局進項以攬載水腳爲大宗月有運漕耗米

及帶貨二成免稅辦米盈餘應令此後如能將耗米照章收足帶
貨免稅按照稅則核計除貼還貨主外尙餘幾成均歸入局中專
款列收不得併入水腳開銷其采辦漕米無論盈虧悉歸公局一
切巨細進款全登公帳記載分明不准遺漏含混至出款約有三
端一爲船用凡在船人役辛工等項每船月定額數修理工料行
船用物須有限制均在所收水腳內開支一爲局用總分各局司
事人等辛資雜費須分別定額均在所提每兩五分公費內開支
儻有不敷不准於公帳撥補仍將收支各數按年詳細開報一爲
棧房船廠之用應在棧租內開支不敷再由局費提補外如購買
船煤置備物業皆應撙節攬載客貨水腳向章每百兩給回用銀
五兩不准濫加務歸一律卽借用錢莊銀亦不可多糜重息以上
出入各款均責成局員權衡緩急督同司事悉心經理勿任別人

稍有滙費其帳目除局員商總隨時互相查覈外並飭江海津海兩關道於每年結帳時就近分赴滙津各局認真清查如有隱冒據實稟請參賠以招核實而免浮議凡此整頓之法已備極周詳惟念招商局之設原以分洋商利權於

國家元氣中外大局實相維繫賴商爲承辦尤賴官爲維持英商力與傾擠商股遂多觀望誠恐虧耗旣巨難以久支貽笑外人且墮其把持專利之計臣等再四籌維祇得就現有之款爲變通之策前經各省借撥官帑倡率濟急取息僅七八釐較商股一分利息尙少原議俟商股充盈卽行歸款現在商本未充生意淡薄官帑又未便久稽該關道等與局員籌議擬請自光緒三年起將直隸江蘇浙江江西湖北東海關等歷年撥存該局官帑銀一百九十萬八千兩均予緩息三年俟光緒六年起緩利拔本勻分五期

每年繳還一期以紓商力每期計應繳官本銀三十八萬一千六
 百兩由商局豫爲籌定按原撥平色銀數先分赴各省關局具結
 存案屆時照繳無論如何爲難不得再求展緩統計八年官本全
 清其級收息款以後或作官股或陸續帶繳屆期察看情形再議
 至官商應甘苦與其前雖議定商股按年給息一分今官利既緩
 嗣後擬將每年應付一分息銀以一半給各商收領一半存局作
 爲續招股本亦按年計息以五釐給商五釐存局彌補缺本俟八
 年後局本補足息卽全給眾商當尙樂從隨時招添新股一律辦
 理惟現計局本短至一百六十萬之多船費並未折算僅將官帑
 級息八年商息留半抵本恐尙不敷補缺擬自光緒三年七月起
 按年截數其有盈餘銀兩暫緩派分全數留局作爲公股照章一
 分起息其息全留作本俟八年期滿統計此項股本積息若干除

酌提換購新船外再分派眾商均濟庶子母相權生生不已局務亦維持於不敝所有保險局存本及新收局船保險銀兩應併歸招商局統算無須作爲浮存照市付息亦無庸月提九五局用別立一局以免盈絀懸殊如此分別秉公調劑冀得上不虧

國下不病商根基既固久遠可期華商應聞風而踴躍洋商或輸誠以議和臣等仍隨時嚴飭該局員商總等恪遵

聖訓和衷辦事勿務虛名而鮮實濟勿圖小利而誤大局勿畏人言而思縮手勿執己見而昧機宜惟以救濟時艱毋負委任爲念自當日有起色矣臣等往返函商意見相同除咨總理各國事務衙門外謹合詞繕摺由驛四百里覆陳伏乞

皇太后

皇上聖鑒訓示再此摺係臣鴻章主稿合併聲明謹

奏

海運官物統歸商局片 光緒三十年十一月二十五日

再臣等欽奉

寄諭董儁翰奏稱沿江沿海各口岸中國官商應需輪船運載貨物能否統歸該局攬載各省漕糧能否再予加成歸該局輪船載運並著該大臣等體察情形妥籌辦理等因欽此伏查輪船載多駛速以中國官商貨物交中國輪船承運本屬名正言順近來雲南解京銅斤四川辦運燈木江浙采辦官物直晉購運賑糧凡由海運者均歸招商局裝載華商貨物向准洋船攬運固未便顯設厲禁令其專歸局船而商局分運商貨亦尙不少應請嗣後沿江沿海各省遇有海運官物應需輪船裝運者統歸局船照章承運若須在不通商地方起卸由局移請海關繕給專照以便關卡查驗而免洋商影射至承運各省漕糧為商局命脈所係現在局船

攬載商貨爲洋船擠跌動輒虧賠非多運漕糧以羨餘補不足萬難持久查近年浙漕分撥較多蘇漕分撥較少昨蒙

恩准江安漕糧明歲改由海運交招商局承運實爲公私兩益應

請

旨敕下江蘇浙江督撫臣轉飭糧道嗣後蘇浙海運漕米須分四五成撥給招商局輪船承運不得短少餘歸沙船裝載以示體恤此外江西湖北采買漕米仍照案歸局船運津但祝年穀順成漕運有加

天庾旣易充盈商局亦需微利無虞洋商擠軋保全實多理合附片覆陳伏乞

聖鑒訓示謹

奏

京城外變通平糶摺

光緒三年十一月二十八日

奏爲京城外平糶設廠防範難周擬請變通辦理或仍照歷屆成案交糧鋪承買出糶請

救地面各衙門會議督飭委員辦理恭摺仰祈

聖鑒事竊前因直境荒歉糧少來路編修何金壽奏請於京城設局平糶奉

旨飭臣妥速籌辦當經奏明轉飭輪船招商局道員朱其昂等籌借資本赴南省起購大米轉運京城擇地設局試辦平糶奉

旨著俟糧石運到酌度辦理等因欽此其時距封河僅及一月遵飭朱其昂等趕在南省采購由輪船跟接運津計至封河截數連直晉兩省賑糶所需共運到白米十餘萬石顆粒皆自南來擬分撥三萬石爲京城平糶之用雖爲數無多實爲時所迫該局員董

均係南人於都中情形不熟稟經臣札派直隸候補知府惲桂孫
通判蔭祿等前往代爲經理據報已在正陽崇文門外西珠市口
欄杆市等處擇定局所次第布置並據朱其昂等招雇船車將米
石陸續由津運抵通州正擬開辦聞適御史林拱樞奏請在城外
設局經戶部議覆照行臣維城外地方荒僻村落零星糴食之人
遠不如城內之眾現又於六門外添設粥廠貧民已就廠糊口則
待糴者益少城內居民相距較遠出城赴糴較難且從前道光年
間東城外定福莊曾有夥搶官糶巨案蓋荒僻之區匪徒易生覬
覦兵役力不能及遂致失事此次係招商局借款經辦該局本無
餘力祇以事關根本民食不得不竭蹶兼營近來城外搶劫頻聞
糶局設有疏虞商本卽歸烏有亦非體恤遠商之道臣再四遵
旨酌度城外設局利少害多似不如仍照原議在正陽崇文門外

一帶設廠平糶人煙稠密之地既可便民而各段官弁兵役亦得就地照料防範似較周妥至倉米不准出城本有官役查察無虞城外居民因此偷漏臣又恭查乾隆五十二年撥發京倉米石平糶案內欽奉

上諭於五城內外揀擇殷實大鋪戶各一處將官米交給該鋪戶自行糶賣仍官爲酌定價值令其稍沾餘潤所有賣出價值卽隨時交納等因嘉慶十五年十八年京城兩次平糶麥石皆仿照辦理欽奉

上諭交鋪領賣事歸簡易者派出之卿員會同五城御史查照舊章訪查殷實鋪戶承領糶賣城內外均勻分撥等因咸豐七年欽奉

上諭著戶部等欽發交順天府尹購買米麥運京酌定價值准令

米鋪承買其出糶時每石酌加京錢一二百文俾商民兩便糶石不致缺乏等因均經欽遵辦理有案誠以交鋪承買出糶無庸另設局廠可省經費之繁仍得平價之益該鋪戶等人地熟習照常糶買亦免意外之虞相應請

旨飭下步軍統領順天府尹五城御史會同體察情形妥速核議如正陽崇文門外可以舉行則局所已經擇定米亦運抵通州卽應開局試辦抑或欽遵歷奉

諭旨將招商局現運到大米三萬石由五城御史查明城內外殷實糧店令照招商局原辦價腳各鋪勻分承買仍官爲酌定售價使其稍沾餘潤自行出糶市價或亦稍平該鋪應交買價卽飭交恽桂孫彙收解交招商局歸款來春開河後如青黃不接仍可察看情形飭該局購運接濟所有京城試辦平糶擬請變通辦理各

緣由謹繕摺由驛具陳伏乞

皇太后

皇上聖鑒訓示謹

奏

會查安陽縣參案摺

光緒三年十二月初三日

奏爲會查知縣典史被參情節分別參辦恭摺仰祈

聖鑒事竊准部咨光緒三年六月初六日奉

上諭御史李桂林奏稱河南安陽縣知縣與典史賦性貪婪視鹽商爲魚肉任意勒索以致商人歇業鹽引滯銷現聞直隸河南州縣紛紛效尤各商稟控之案層見疊出等語著李鴻章會同李慶翱秉公確切查明據實參辦等因欽此遵查此案會據安陽縣鹽商益照臨赴直呈控已咨前河南撫臣李慶翱會派委員查辦欽奉前因臣鴻章卽派直隸候補知府劉惟金前往河南一面知會李慶翱札委河南候補知府朱壽鏞會同確查據實稟請參辦並由李慶翱將調署祥符縣事安陽縣知縣趙集成安陽縣典史李元愷撤任茲據該委員劉惟金朱壽鏞稟稱查得該縣城北安陽

河向有大石橋一座爲鹽車商貨所必經年久失修漸至傾圮光緒元年三月間趙集成到任後據紳民稟請興修當因庫款難籌飭商民合力捐辦該紳民一時力有未逮因益照臨素來急公好義勸令該商先行籌墊俟次年仍由紳民集捐歸還並議以所墊經費陸續繳至公局收發趙集成當派家丁楊玉張福在彼監修自開工迄工竣除趙集成倡捐制錢二千串該商先後籌交銀七千三百三十三兩零按市價合制錢一萬三千二百串內認捐銀二千六百六十六兩計代墊銀四千六百六十七兩零除撥用工費外尙餘銀二百兩趙集成卽遣該家丁楊玉張福先行送還取有該商收條附卷乃值地方歉收紳民驟難歸款趙集成亦未飭催該商以墊款虛懸先還之餘銀二百兩又未收到因而缺望嗣經趙集成查知楊玉等有乾沒餘銀捏造收條情事楊玉已於今

年五月初十日病故無可追究張福亦先期遣散卽經緝獲到案訊認聽從楊玉捏造收條將餘銀二百兩全數乾沒伊分得銀八十兩屬實解送開封府審辦其餘該商所墊之銀現經該縣紳耆王芝田等如數措還收領清款趙集成尙無魚肉商人任意勒索情事典史李元愷亦查無焚索實據現在另有控案應歸另案辦理等情稟請核辦前來臣等復核此案既據該委員等查明該縣趙集成因興修地方橋座借用鹽商銀錢以爲工費事尙因公現據按照原議措還該商收領清款惟家丁捏造收據乾沒銀二百兩該員失於覺察實難辭咎應請

旨將安陽縣知縣趙集成交部照例議處典史李元愷既查無焚索實據應由豫省歸於另控之案查明參辦家丁張福卽交開封府嚴訊確情從重治罪至安陽縣引岸仍係該商益照臨承辦並

未歇業此外直豫鹽商間有稟控案件臣等已隨時飭令秉公查辦認真整頓現值商情疲敝鹽引滯銷當嚴飭各地方官實力緝私循照成章妥善經理如查有夔索情弊指名嚴參務期官商相安俾課運日有起色所有會查參辦各緣由謹合詞繕摺覆陳伏乞

皇太后

皇上聖鑒訓示謹

奏

禁止燒鍋片

光緒三年十二月十八日

再直境糧價增昂由秋成歉薄亦因耗費太甚通省燒鍋約計千餘家每日需用高粱兩萬餘石每月共需六七十萬石即以每人日食一升而論該燒鍋等一日之費已佔二百數十萬人之食境內及外來之糧往往被其購用遂致民食缺乏雖招徠遠近商販源源運糶價不能平查永平遵化宣化順天各屬燒鍋最多其在永遵者並用海船自赴奉省大宗采買今直晉災區皆指奉糧接濟勢難任其爭購夫酒可終年不用日不再食則飢輕重原自有別該燒鍋等每歲應交課銀統共不過三萬餘兩所益於庫款者有限而佔奪窮民口食貽害於閭閻者實深自來荒政本有禁酒之條山西近已奉

諭飭禁燒鍋直省為畿疆重地際此糧價日增民生困苦更宜舍

級就急應請除熱河承德府歲豐糧賤可勿置議外凡直隸各屬
燒鍋自明年正月起暫行停燒以濟民食俟秋成豐稔後仍准開
燒依舊納稅如蒙

俞允卽由臣出示曉諭禁止儼有限內私燒照例治罪並通飭地
方官秉公查察不准胥役得規包庇或藉端擾索違則從嚴參辦
分別重懲理合附片陳請伏乞

聖鑒訓示謹

奏

近省隄河籌動息款片

光緒三年二月十八日

再附近省城隄河歲搶修經費前經奏准每年於清河道庫積存
河淤地租項下撥銀三千兩應循辦在案茲據該道葉伯英詳
稱道庫河淤地租一款每年本止額徵銀二千四百二十餘兩加
以旱澇頻仍疊有蠲緩統計歷年積存及續徵共銀一萬一千餘
兩除額支安州州判等汛水手工食潞龍河下口挑淤工費趙王
河鷹背壩開夫工食並動撥光緒元二三年前項歲搶修經費外
僅存銀八百五十餘兩不敷應撥來年歲搶修之用查道庫尚有
千里長隄善後案內積存坐船叔夫生息一款截至同治十三年
報銷計存息銀一萬一千九百三十兩零又六分平銀一百兩零
又應入光緒二年報銷收存前任深州解繳同治七八年息銀三
百四十四兩零此項息銀本爲疏治沈河修護長隄而設新開之

趙王河即以節宣全淀盛漲其南隄即係千里長隄應請將每年歲搶修銀三千兩自光緒四年爲始在於道庫積存坐船叔夫生息項下按年動支俟數年後河淤租銀徵存成數仍照原案動撥本款等情具詳前來臣查前項隄河工程關繫數縣民生利害今因原撥經費本款不敷仍在道庫籌動息款應用俾修防不致廢弛庫項亦無出入自應照辦除飭遵外理合附片具陳伏乞

聖鑒敕部查照謹

奏

張家口工程摺

光緒三年十二月十八日

奏爲勘估張家口駐防營房塌工分別籌撥欠餉稅課修辦恭摺
仰祈

聖鑒事竊前因張家口駐防營房塌工被水衝塌經臣委員查勘
奏交察哈爾都統就近遴派本處營員逐細勘估承修旋據瑞聯
等以營員估報之數較多工程不能諳悉仍奏歸直隸委員估修
臣於奉

旨後卽經行司飭委候補直隸州知州楊蔚本馳往會同萬全縣
查勘估報乃本年六月二十七日大雨如注山水漲發隄壩營房
復多衝塌瑞聯等以左翼營房地勢低窪擬相度高做地方移建
四旗營房並修理隄壩奏奉

上諭著臣迅飭委員會同地方官酌度情形查勘估修等因欽此

又經行司添派候補知府陳慶滋前往與楊蔚本及萬全縣安細相度籌商勘估並由司酌籌修費茲據陳慶滋等稟稱會同駐防協佐領等官連日相度籌商左翼四旗營址固較低窪但張家口四面皆山人煙稠密附近地面窄小不堪移建僅得菜園地二段其間尙有民房勢難佔用且土性鬆浮建房不能穩固若移於遠處官兵差操守口諸多不便是以歷今百餘年之久總未議及移營同治十年前任都統慶春原奏有不能挪移無可遷避之語蓋限於地勢也訪之耆老兵民所言皆同亦無此項巨費自應仍在舊基設法張家口向係堵水築廬專賴大境門外石壩抵禦鋪戶居民門前有閘並將壩間年年自行加修今營旁河身半已淤高土壩不如石壩又失修年久水至難免被害今年水勢較大害亦較甚應將土壩改爲石壩加高培厚再於壩外自東往西添築虎

皮石攔水壩一道長九十餘丈並將原有之虎皮石壩一律修整挖去河內淤沙計長二百四十丈寬十丈深四五尺不等下面係邊路街卽令民間接挖庶河身通暢水可順流營基自固計修辦河壩約需實銀二萬餘兩至左翼四旗官營兵房九百六十間右翼四旗官營兵房九百六十三間蒙古兩翼官營兵房四百七十九間共二千四百二間或全被衝去木料磚瓦無存或頂架坍塌木料折斷磚瓦酥碎應分別新建拆修其尙可棲止者重加黏補計共需實銀七萬餘兩稟經藩司孫觀查係萬不可緩之工所估修費亦甚核實該口天氣嚴寒仲春始能動工夏秋大雨時行初冬又復冰凍皆應停止此次應修營房壩工甚大若皆歸地方印委挨次經理必不能剋期蒞事官兵亦難盡處久候查該駐防新設精銳營營房係由該營協佐領建造是承辦已著成效現在應

修營房應由各該營協佐領會同直隸委員卽於開春妥實修辦
己據委員商明協佐領各願分司其事同時興工迅速告竣其河
壩工程卽責成地方官核實承修並飭委員會督照料至該駐防
營房自道光九年以後均按八年借餉請修一次仍分年扣還久
未動帑實緣庫藏支絀無款可籌此次所需工料銀兩如仍借支
新餉恐該兵等被水困苦力有未逮查司庫有積欠該駐防同治
二年以前五七成俸餉惟因連年積歉入不敷出今歲又值旱荒
賑撫所需及緊要餉項尙難設措斷無餘力全籌此項欠餉查前
因司庫欠發該駐防俸餉曾經提撥察哈爾都統衙門茶馬釐捐
有案應請照案於該衙門現收茶馬釐捐項下奏撥實銀二萬兩
又撥口北道庫扣存該營上次修房借動茶馬釐捐實銀五千五
百兩又撥口北道庫歷年積存朋扣建曠等實銀四千五百兩其

合實銀三萬兩協濟司庫湊發該駐防欠餉尙短實銀四萬餘兩
再由司竭力設法陸續湊撥併作欠餉以應此次修房工費既由
該營捐餉修辦應照章免其造冊報銷所發欠餉並動撥茶馬釐
捐等銀各歸奏銷案內列報就款開除至修理河壩工需實銀二
萬餘兩查有張家口監督徵收稅課從前撥作餉需有案並請援
案於該監督所徵稅課項下奏撥實銀二萬兩不敷之數由司添
給事竣照例造冊報銷此項工程係按十成實銀撙節估計無庸
折發六成虛擬數目轉涉浮冒現因該營無處棲止是以勉籌欠
餉俾應急需此外各營不得援以爲例等情由司具詳請奏前來
臣查該駐防營房被水衝塌弁兵無處棲身工程實爲緊急其左
翼營房旣無移建處所自應照議挖河築壩以濬水道而保營基
右翼及蒙古兩翼營房仍循舊址分別建修俾資棲止所需營房

工費亦應如議提用欠餉惟疊年災荒丁糧蠲緩藩庫極形支絀實難全籌應請照案於察哈爾都統衙門徵收茶馬釐捐項下撥實銀二萬兩口北道扣存該營上次修房借茶馬釐捐項下撥實銀五千五百兩歷年積存朋扣建曠項下撥實銀四千五百兩再由藩庫湊撥實銀四萬餘兩均抵欠餉就款開除免其冊報並令該駐防協佐領等官認真分司其事會同直隸委員及時妥實修建其修理河壩實銀二萬餘兩應請援照成案於張家口監督徵收稅課項下就近撥銀二萬兩其餘由藩庫添撥實成地方印委核實承修庶眾繁易舉要工可期速竣理合會同察哈爾都統臣穆圖善副都統臣奎昌合詞繕摺具

奏伏乞

皇太后

奏
皇上聖鑒訓示遵行謹

南北籌運濟賑摺

光緒三年十二月二十三日

奏為直晉豫災區太廣需糧甚殷亟賴南北各省招商販運接濟

旨酌籌辦理恭摺陳仰祈

聖鑒事竊臣欽奉光緒三年十二月十七日

寄諭給事中郭從矩奏稱晉豫兩省災黎甚眾待賑孔殷擬請由盛京江浙湖廣山東各省素產糧米之區出示招商采買米石俟集有成數報知各該地方官借用官辦輪船由江蘇上海為之濟運直達天津更以回空之船分赴煙臺牛莊裝運雜糧亦達天津聽憑商人自行裝載分赴晉豫售賣以資接濟京師糧價藉可稍平並請飭直隸撥兵護送以免飢民沿途截搶等語采買糧石自是日目前要務該給事中所陳各節是否可行有無窒礙著李鴻章

酌度情形通盤籌畫並咨行各將軍督撫商一切酌量辦理所
稱由兩江總督及福建船政大臣各撥輪船一二號專聽商販運
米赴津經費仍由該局給發或令商人酌貼若干之處著沈葆楨
吳贊誠妥爲籌議仍著咨商李鴻章斟酌辦理等因欽此遵查本
年直晉豫三省皆被旱災糧缺價昂貧民艱於糊口晉豫災象尤
重除河南暫由鄰省就近采購外直晉則專指南北各省糧石源
源接濟經臣

奏明委員分往采購用輪船運津轉發賑糶並招徠商販一體購
運在案奉天雜糧尤便北省民食今年秋收豐稔業經崇厚飭將
該省內地新糧陸續運至營口天橋廠等處以待開河出售請備
船隻屆時往運其蘇浙江鄂湘皖山東等省雖非一律豐收而酌
盈劑虛官民皆有同情尚未便遏糶以絕北方之食況直晉豫麥

多未種迄今尚未刈需澤民困益深來年春夏飢荒情形殆有不堪設想者必賴各省招商廣運糧石通力合作多多益善藉資補救郭從矩所奏實爲目前要務並無窒礙之處

臣仰體

聖朝一視同仁通盤豫爲籌畫已咨行

盛京江蘇安徽浙江江西湖北湖南山東各將軍督撫臣酌量出示招徠殷商無論米麥雜糧運赴本省及附近鄰省通商口岸自行雇搭中外輪船及夾板商船於明春開河後陸續運津各省通商口岸皆有往來商輪儘可隨時就地雇搭不必專候官辦輪船致有稽延擁擠其到津後運路甚廣銷售必易仍聽商民自相交易分運京城直屬及晉豫等省但期遠商輻輳價值自可漸平民食無虞缺乏至閩廠官輪船臣前已預行咨調三隻於來春駛赴天津以備轉運官糧之用由津核給煤價茲又咨商吳贊誠除壘

防及各口巡操運送餉械外如何可分撥數隻應令赴上海總口
停泊卽飭署江海關道劉瑞芬妥爲經理以便糧商分起搭運北
上庶船隻較多轉輸更易其滬廠所製兵輪船與商船格式不同
裝載無多煤費甚重但行駛較民船爲速能否分撥以濟商運臣
並咨商沈葆楨轉飭督操輪船道員吳大廷察酌辦理該輪船口
糧等項仍由各局給發應如何令商人酌貼煤價由沈葆楨吳贊
誠核飭吳大廷劉瑞芬妥辦至煙臺爲由滬至津經過之路牛莊
距津亦近除由該兩口商輪船隨時裝運外如閩滬官輪船有可
添撥應於到津後飭署津海關道丁壽昌妥籌令其分赴該兩口
協運商販米糧用費周轉凡商運糧石經過直隸地而前已疊次
飭護茲復分行州縣營汛防軍各按地段隨時認真接替護送務
保無虞如以後糧販較多應再添撥練軍擇要巡護以昭嚴密該

弁兵各有口糧無庸另給仍不准絲毫紊擾山西省采購米糧經過沿途關卡前已

奏准免徵釐稅又欽奉八月二十六日

上諭凡有商賈運赴晉豫米石經過地方著各該督撫飭屬免收釐稅等因應仍欽遵一律辦理總期順商情而使運務庶於北數省籌賑全局有裨所有遵

旨酌籌辦理緣由除分咨查照外理合恭摺山驛覆陳伏乞
皇太后

皇上聖鑒訓示謹

奏

晉賑獎章程

光緒二十二年十二月二十三日

奏爲申明晉省賑捐請獎章程以期踴躍而蘇民困恭摺仰

祈
聖鑒事竊臣國荃前因山西賑款甚鉅於本年六月九月兩次奏
准仿照天津成案勅捐接濟嗣准戶部鈔咨議覆侍郎袁保恆給
事中郭從矩條陳豫晉兩省賑捐原摺內開花翎藍翎均准照案
收捐道府州縣准捐至三班爲止其一切收捐章程仿照黔局辦
理奏奉

諭旨照准各等因在案仰見

聖恩軫念災區無微不至欽感莫名惟晉省被災地方極重極廣
業經臣國荃將流離困苦情形疊次瀝陳現在節逾三九未沛祥
雲明春飢困更屬可危果能多收一分捐輸即可多救一分民命

惟捐輸之衰旺以邀獎之遲速爲斷前次各省紳商捐輸業經部
議由臣鴻章仿照天津賑捐成案奏咨請獎此次准照黔章收捐
亦由部議奏准仍由直隸督臣咨部給獎臣等往返函商所有各
省紳商前此捐款兌收截清數目奏報仿照天津賑捐成案核辦
其續奉部議仿照黔章收捐應以津局爲總匯之所由津局委員
按照黔章核算造具履歷清冊詳由臣鴻章分編次數隨時咨部
請獎以期踴躍仍俟一年期滿後酌核情形應否停捐再行奏明
辦理至黔捐章程惟銀捐分先前等項班次不准兌收其實官三
班花樣分發指省均在兌收此次部議既准令一切仿照黔捐章
程收捐若僅准捐至三班爲止捐生既在此局報捐仍須赴黔局
報捐分指花樣往返輾轉實形遲滯捐輸斷難踴躍現在晉民待
賑急切萬分明春需款甚鉅不得不預爲籌措查天津賑捐成案

報捐官職向准其請給花樣省賑捐應請統照黔章凡道府州縣以及各項實官均准其報捐分發指省花樣等項以免向隅惟銀捐分先等班次仍不准免收庶與黔章吻合捐生無所避就且既有年限於黔捐亦無妨臣等爲晉災甚廣力求捐輸踴躍以救殘黎起見謹合詞恭摺具陳伏乞

皇太后

皇上聖鑒敕部知照施行謹

奏

李文忠公奏稿卷三十